

INUIT ATAQATIGIIT

INATSISARTUNI



UPA16/25
11. april 2016
Peter Olsen

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2016-imeersoq. (Soraarnerussutisiaqarnissamut aaqqissuussinernik nunanut allanut nuussineq)
(Aningaasaqarnermut Aatsitassanullu Naalakkersuisoq)

Aningaasaqarnermut Aatsitassanullu Naalakkersuisup qulaani pineqartoq pillugu siunnersuutaa matumuuna Inuit Ataqatigiinniit imatut oqaaseqarfigissavarput.

Siunnersuutaasup siunertaraa §40 malillugu soraarnerussutisiaqarnissamut ileqqaarutaasimasut piffissaanngitsukkulli tiguneqarsimasut, piffissaanngitsukkut tigusimaneranut akileraarutaasartup 45%-isup nunatta karsianut, kommunit karsiannut, kommunimullu akeraarfiusimasup karsianut nakkartaraluartut, tamarmik nunatta karsianut nakkartinneqartalernissaata anguneqarnissaa.

Aningaasat immikkut ittumik isertitatut nalunaarsorneqartarput, aningaasaateqarfimmullu ikineqartarsimapput, taassumalu kingorna namminersorlutik oqartussanut, kommuninullu agguarneqartarsimallutik. Akileraarutitut taamatut isertinneqartartut ullumikkut 5 mio.kr.missaanik annertussuseqartut oqariartuutigineqarpoq.

Aningaasat isertinneqartut tamaallaat Namminersorlutik Oqartussat karsianut nakkartalerpata, tamanna kommuninut annaasaqaataanaviannngitsoq Naalakkersuisut oqariartuutigaat, tunngavilersuutigalugu kommuninngooq annaasaqaatigisassaraluatik bloktilskudit aqutugalugit utertissinnaagaat.

Taamaakkaluortoq, tusarniaanermi akissutaasut qiviassagaanni Qaasuitsup Kommuniata 1. mio.kr.missaanik aannaasaqarnissartik naatsersuutigaat, siunissamilu bloktilskuddit minnerpaamik 3 mio.kr.-nik amerlineqarnissaat, taassumalu saniatigut aningaasaateqarfimmi ilaasortaatitaqalernissartik kissaatigalugu.

Kommuneqarfik Sermersuup aaqqissuusineq nutaaq isertitakinnerulernissamik kinguneqarnissaa ernumassutigaat, inatsisissamillu allannguiniarnerup unitsinneqarnissaa kissaatigalugu. Taassuma saniatigut allannguinninnermi aningaasatigut qanoq kinguneqarsinnaaneramik naatsersueqqissaartoqarnissaa kissaatigalugu.

GE-ip maluginiagaasa ilaat ataaseq soqutiginarpoq, tassalu oqariartuutigimmassuk inatsisissatunngooq allannguutissatut siunnersuummi aningaasaateqarfimmik pilersitsinissaq ilanngunneqarsimannngitsoq, tassa takuneqarsinnaanngitsoq, naak tamanna aamma eqqartorneqaraluartoq. Taamaattumik kissaatigalugu tassuunakkut ersarissaasoqarnissaa.

Naatsumik oqaatigalugu inatsisissatut siunnersuut tusarniaavigineqarsimasunit amerlanerpaartaaniit tamakkiissumik taparserneqanngilaq; bloktilskudit aqutugalugit annaasaqataasussat taarserneqarsinnaanerannik naalakkersuisut oqariartuutaat qulakkeerneqarsinnaanngitsutut isigineqarpoq. Kommunit annaasaqarnerulernissaartik ernumassutigaat, GE-llu ernumassutigaa aningaasat aningaasaateqarfimmut nakkaalersussat siunertarineqartoq malillugu atunngitsoorneqarsinnaanerat, immaqalu allaat nunatta karsianut imaarutilersumut nakkartiinnarneqarsinnaanerat ernumassutigalugu, taamaattumik inatsimmi nutarterneqartussami aningaasaateqarfiup qanoq ingerlatseriaaseqarnissaa pillugu ersarissaasoqartariaqartoq kaammattuutigalugu.

Tamanna pillugu Inuit Ataqatigiinniit inatsisissatut siunnersuut taamatut isikkoqartillugu akuerinngilarput, ernumasuttaasut paatsuungassuttaasullu qulaani pineqartut qulaajarneqarnissaat siunertaralugu aningaasaqarnermut ataatsimiisitaliamut ingerlateqqinnissaa kissaatigaarput.

Qujanaq.

In.in.

Peter Olsen